

## **Pol ndê bapia tilu-nga têtj Timoti Yom whê bapia dindéc sa-nga**

Pol ndöc gapocwalô ndöc Rom, ma kêsahê bu ñasawa saun oc sêndic in ndu, dec to ndê bapia tilu-nga dindéc têtj Timoti. Pol tac whin Timoti ndu andô, ma to bapia dindéc bu puc in dön bu lhac ñannga, ma maya dau me töc dau dom bu hoc ñawaê ñayham asê. In tac whin bu Timoti lhac gitôm Yisu ndê ñgac sin-nga ñayham dan. Ma Pol gêm la Timoti bu yob dau tu mêtê sac tidau-tidau nan oc êñsôwec tiatu têtj têtj nambu-nga, ma kêtj puc in pi kêdôhônwaga tasan.

### *Pol gic hu ndê bapia*

<sup>1</sup> Aô Pol, nan gati Yisu Kilisi ndê taposel kêtuc Anötö ndê atac whin. In gic bata bu lau nan sêkêtj whin Yisu Kilisi oc sêtap sen sêndöc tali-nga sa, dec kêtjalin aô sa gati aposel, bu wahoc yom dau asê têtj lau.

<sup>2</sup> Gato bapia dindéc têtj anen atungac tac whin-nga, am Timoti. Mwasin ti tawalô ma yom malô akêtj Daman Anötö lu yac nen Pômdau Yisu Kilisi têtj am.

### *Pol puc Timoti dön*

<sup>3</sup> Aô gam akin Anötö têtj daman sêkôm, ma galhac in ango-nga ti atac pa su tu anen lêtj-nga. Ma têtj ôbwêc ti acsalô, aô gauc gêm am yêtj

aneŋ mbec ŋalôm, ma aö gam danŋe Anötö tu am-ŋga.

<sup>4</sup> Aö gauc gêm ndoc nan hêclu dahu dauŋ siŋ, ma am taŋ. Tu dinaŋ-ŋga aö tac whiŋ bu walic am tiyham, oc kôm aö atac ŋayham sa.

<sup>5</sup> Ma aö gauc gêm am nem lêŋ kêŋ whiŋ ŋanŋa-ŋga. Aö kayalê bu am nem pômwê Lois lu dinam Yunis sêkêŋ whiŋ ŋanŋa, ma gakêŋ whiŋ bu am kêkuc iŋlu si lêŋ.

<sup>6</sup> Tu dinaŋ-ŋga dec aö bu wateŋ am bu gauc nem Anötö ndê mwasiŋ nan am kôc têŋ ndoc aö gakêŋ aman sac am. Lhac ŋanŋa ma kôm gwelen ŋa mwasiŋ dau ŋa-ŋaclai, gitôm am kôm ya golom tiatu.

<sup>7</sup> Anötö kêŋ ndê Ŋalau têŋ yac, ma bocdinaŋ dec datöc dauŋ tu sake-ŋga? Iŋ kêŋ ndê Ŋalau tu kêŋ ŋaclai têŋ yac, ma tu dambo ti mêtê atac whiŋ lau-ŋga, ma dayob dauŋ neŋ lêŋ-ŋga.

<sup>8</sup> Bocdinaŋ mayam daôm tu hoc yom asê pi yac neŋ Pômdau-ŋga dom. Ma mayam tu aö gandöc gapocwalô tu iŋ-ŋga dom. Mba! Lhac ŋanŋa whiŋ aö ma hêclu dahôc ŋawapac tu Yisu ndê ŋawaê ŋayham-ŋga, tôm Anötö dau kêŋ ndê ŋaclai bu puc hêclu dôŋ.

<sup>9</sup> Iŋ gêm yac si ma kêgalêm yac sa bu dasa iŋ ndê lêŋ dabuŋ. Iŋ kôm gêŋ dau tu yac neŋ ŋayham danŋa dom. Magoc iŋ kôm tu iŋ dau ndê mêtê atac whiŋ ti êmwasiŋ yac-ŋga. Têŋ têm iŋ kêŋ undambê ti nom su dom, nan iŋ kêmatiŋ yom tidôŋ bu êmwasiŋ yac tu Yisu Kilisi-ŋga.

<sup>10</sup> Ma yac neŋ †Ŋgac Nem Yac Si-ŋga Yisu Kilisi meŋ hôc asê nom su, dec Anötö ndê mwasiŋ dau

menj tiawê. Ma nawaê nayham tôc asê bu Yisu Kilisi ku naclai dambac ndu-nga dulu, ma inj ti yac neñ senj dandöc tanli napan-nga.

<sup>11</sup> Ma tu nawaê nayham dau-nga, dec Anötö kêyalinj aö sa gati ngac ahen-nga ma aposel, ma kêkinj aö bu wandôhôn lau.

<sup>12</sup> Tu dinan-nga dec gahôc nawapac dindec. Magoc aö mayanj daunj dom, galhac ti atac pa su. Nahu bu aö gakênj whinj Yisu Kilisi, ma aö kayalê inj tidônj. Ma gakênj daunj ti neñ gêñ honj sip inj amba, ma gakênj whinj bu inj gitôm bu yob napep e bêc nambu-nga.

<sup>13</sup> Yom nandô nanj aö kadôhônj têtj am, nanj kôc dôñ gitôm dôhônj nayham bu êndôhônj têtj lau. Ma lêtj dakênj whinj-nga ti atac whinj asidôwai-nga, nanj gic lau sêkênj whinj Yisu Kilisi-nga nawaê, nanj am sap dôñ nanja.

<sup>14</sup> Nalau Dabunj nanj mbo yac lau dakênj whinj-nga neñ nalôm, nanj puc am dôñ bu yob yom nandô dakênj whinj-nga nanj aö gakênj sip am amam su.

<sup>15</sup> Am kêyalê bu Pigelas lu Hemogene ma lau Esia-nga honj nanj sêmbo malac Rom, nanj sêhu aö sinj su.

<sup>16</sup> Magoc aö watenj Pômdau bu tawalô Onesiporas ti ndê gôlôwac honj, nahu bu inj gêñ aö sa tidim daêsam. Ma inj maya tu aö gandöc gapocwalô-nga dom.

<sup>17</sup> Têtj ndoc inj hôc asê malac Rom, nanj kêsâlê aö nanja e tap aö sa.

<sup>18</sup> Ma am kêyalê su bu têtj ndoc aö gambo malac Epesas, nanj inj gêñ aö sa daêsam. Tu

dinaŋ-ŋga aö wateŋ Pômdau bu tawalô in, ma nem in sa tēŋ bêc ŋambu-ŋga.

## 2

<sup>1</sup> Bocdinaŋ aneŋ balê, lhac ŋaŋga tôm Yisu Kilisi ndê mwasin puc am dōŋ.

<sup>2</sup> Yom naŋ aö gahoc asê yêc lau daêsam aŋgô-ŋga, naŋ am ŋô su ma kêyalê. Kwahic dec aö bu wasôm tēŋ am bu êmyalin lau ŋatô sa, naŋ sêsap Kilisi ma yom ŋandô dōŋ ŋaŋga, ma êmdôhōŋ yom dau tēŋ ŋac e sêŋyalê tidōŋ, goc sêkôm gwelen sêwhin am ma sêndôhōŋ lau ŋatô.

<sup>3</sup> Lhac ŋaŋga ma hōc ŋawapac whin yac, tôm Yisu Kilisi ndê ŋac sin-ŋga ŋayham daŋ.

<sup>4</sup> Ŋgac sin-ŋga ŋayham kōc gauc pi in ndê gwelen ndic sin-ŋga ŋapaŋ, ma hêgo dau tu gēŋ ŋatô-ŋga dom. Ŋahu bu in bu kōm gēŋ hoŋ tōm in ndê ŋadau tac whin.

<sup>5</sup> Ma ŋalēŋ tigeŋ, asa naŋ kēti whin lau naŋ sēnti tu sêhōc gēgêlêc dandi-ŋga, naŋ kēti kēkuc ŋagōlin solop. In bu êŋkuc ŋagōlin dom, dec oc tōm dom bu in kōc ŋaōli naŋ gic waê ŋgac ŋamata-ŋga.

<sup>6</sup> Ma ŋalēŋ solop bu ŋgac gwelen andô kōc gēŋ ŋandô tu neŋ-ŋga yêc ndê ôm tinamata.

<sup>7</sup> Kōc gauc pi aneŋ yom hoŋ dindec, bu Pômdau oc whê am nem gauc sa pi yom dau ŋahu.

<sup>8</sup> Am bu hōc ŋawapac, dec gauc nem Yisu Kilisi naŋ sa akēŋ Dawid ndê toŋ, naŋ Anötö uŋ in sa akēŋ lau batê-ŋga. Ŋawaê ŋayham naŋ aö gahoc asê, naŋ ŋahu in dau.

9 Tu n̄awaê n̄ayham dau-n̄ga, dec gahôc n̄awapac ma sêsô aô dôn̄ n̄a sen gitôm n̄gac sac dan̄. N̄ac sêsô aô dôn̄, magoc oc tôm dom bu sêsô Anötö ndê yom dôn̄.

10 Aô galic n̄ayham bu wahôc n̄awapac, tu bu wanem lau nan̄ Anötö kêyalin̄ n̄ac sa muñ su, nan̄ sa. Aô bu watôc sen̄ têt̄ n̄ac bu sêtap Anötö ndê mwasiñ nem n̄ac si-n̄ga sa tu Yisu Kilisi-n̄ga, ma sêndöc tali n̄apan̄ yêc Anötö ndê gamen̄ n̄awê-n̄ga.

11 Yom dindec in̄ yom n̄andô solop̄:

Yac bu dambac ndu dawhin̄ Yisu, oc dambo tan̄li dawhin̄ in̄ bocdinañ.

12 Yac bu dalhac n̄an̄ga têt̄ ndoc n̄awapac tap yac sa, dec yac oc danem gôlin̄ dawhin̄ in̄.

Yac bu dasôm bu dati in̄ ndê dom ma dasêc in̄ ahuc, dec in̄ oc sêc yac ahuc bocdinañ.

13 Yac bu dakên whin̄ gwalec, tigen̄ Yisu in̄ Yom N̄andô N̄adau, ma yom bocke nan̄ in̄ gic bata tu yac-n̄ga, nan̄ oc kôm n̄andô sa. N̄ahu bu in̄ gitôm dom bu sêc dau ndê yom ahuc.

### *Anötö ndê lau gwelen̄-n̄ga si lêt̄*

14 Yom hon̄ dindec, am kêñ lhac gôlôwac dabun̄ si gauc n̄apan̄ e tidôn̄ n̄ac. Yêc Anötö an̄gô-n̄ga kêñ puc n̄ac bu sêsen̄ dandi tu yom n̄ambwa-n̄ambwa-n̄ga dom. N̄ac bu sêsen̄ dau, dec oc n̄andô mba, ma oc kôm lau n̄atô si sêkên whin̄ tisac.

15 Êmsahê n̄an̄ga bu kôm nem gwelen̄ hon̄ bu ndic Anötö tandô n̄ayham. Ma in̄ oc lic am gitôm n̄gac gwelen̄-n̄ga n̄ayham nan̄ whê in̄ ndê yom

ɲandô sa ɲapep, ma gêɲ daɲ oc kôm am mayam daôm dom.

<sup>16</sup> Ndic ahê lau naɲ sêɲlhiɲ Anötö siɲ ma sem yomgalôm pi gêɲ ɲambwa-ɲambwa nom-ɲga ɲapaɲ. Bu lau naɲ sêsap yom kaiɲ dinaɲ dôɲ, naɲ si mêtê sac oc êɲsôwec tiatu ɲapaɲ e sêhu Anötö siɲ gacgeɲ.

<sup>17</sup> Ma yom dau oc tiapa ma kôm lau sêtisac, nditôm gambocbôm sac naɲ gêɲ lau tidac-tidac. Himeneus lu Piletus sêmbo lau dinaɲ si toɲ ɲalôm.

<sup>18</sup> Inlu sêhu yom ɲandô siɲ su. Sêsôm têɲ lau bu ndoc lau sêtisa akêɲ lau batê-ɲga meɲ hóc asê su. Ma bocdinaɲ sêkôm lau ɲatô si sêkêɲ whiɲ tisac.

<sup>19</sup> Magoc Anötö ndê yom ɲandô in gitôm alhö ɲaɲga, naɲ in po in ndê gôlôwac dabuɲ sa sêlhac ɲahô. Ma in kêɲ yom ɲalhô dinda lu têɲ yac bocdec bu, “Lau naɲ sêti Pômdau ndê lau, naɲ in kêyalê ɲac hoɲ tidôɲ,” ma “Lau hoɲ naɲ sêsôm bu sêkêɲ whiɲ Pômdau, naɲ sêhu mêtê sac hoɲ siɲ maɲ.”

<sup>20</sup> Wapa gwelen-ɲga tidau-tidau yêc ɲgac ti lêlôm ndê andu ɲalôm. ɲatô gic waê gwelen tiwaê, ma ɲatô gic waê gwelen bambaliɲ. Gêɲ tiwaê sêmasaɲ ɲa gol ma silba, ma gêɲ waêmbe sêmasaɲ ɲa a me nom.

<sup>21</sup> Ma yêc yac ɲamalac bocdinaɲ. Mêtê daêsam yêc tu taɲkuc-ɲga. Asa naɲ timêtê dau ɲapep ma hu mêtê sac hoɲ siɲ, naɲ gitôm gêɲ naɲ sêmasaɲ ɲa gol ma silba. In oc ti ɲgac akiɲ ɲayham ma dabuɲ bu nem akiɲ yac neɲ ɲadau,

ma in oc tòm bu kòm gwelen nayham-nayham daêsam.

<sup>22</sup> Mêtê ñalôm ñagalac-nga nañ balêi sêkôm, nañ hu siñ gacgeñ. Ma êmkuc lèn gitên ti mêtê dakên whiñ-nga ti atac whiñ lau-nga ma lèn yom malô-nga, tòm lau nañ sêkên whiñ Pômdau sêkôm ti ñalôm ñawasi eñ.

<sup>23</sup> Lau nañ sêsen dau tu yom gauc mbasi-nga, nañ ndic sôn daôm whiñ ñac dom. Bu yom kain dinañ oc li lau sa ma sêkên kisa dandi.

<sup>24</sup> Asa nañ bu ti Pômdau ndê ñgac akiñ nayham, nañ ndic ahê yom nañ kòm lau sêsen dau-nga mañ. Ma in kôc ndê ñalôm dôn ma tac ñandê ñagahô tu gên nañ lau sêkôm tên in-nga, nañ dom. Nayham bu in ñgac tiguauc nañ gitôm bu êndôhôn lau ñatô, ma in kòm mêtê malô ti ñayham tên lau hoñ.

<sup>25</sup> Lau nañ bu sêsen Anötö ndê yom ñandô, nañ goc in oc êndôhôn ñac ti ndê ñalôm malô, bu mboe Anötö oc kên ñac sênem si ñalôm kwi, ma whê ñac si gauc sa e sênyalê yom ñandô.

<sup>26</sup> Ñac oc sênyalê bu muñ-nga sêpen sêsip Sadañ ndê akô si, ma sêti in ndê lau akiñ ñambwa nañ sêkôm tòm in atac whiñ. Magoc ñac bu si gauc sa ma sênem dau kwi, dec oc tòm bu sêhu Sadañ siñ ma sêsa Anötö ndê lèn.

### 3

#### *Mêtê sac têm nambu-nga-nga*

<sup>1</sup> Aô wasôm tên am bu tên têm nambu-nga mêtê sac daêsam oc meñ sa.

<sup>2</sup> Lau oc atac whiŋ dau ma atac whiŋ mone hôc gêlêc, ŋac oc sêpo dau sa ma sêsôm yom sêtoc dau sa-ŋga daêsam, sêsôm yom sac-sac daêsam, daŋgapêc têtŋ damba ti dindai, sênem daŋge lau naŋ sêkêtŋ gêtŋ têtŋ ŋac-ŋga dom, ma sêtec mêtê dabuŋ ti mêtê gitêtŋ.

<sup>3</sup> Ŋac oc atac whiŋ lau dom ma sêsôm yom sac pi ŋac, ma ŋac oc sêsuc lau ŋatô si yom kwi dom. Ŋac oc sênem gôliŋ dau si lêtŋ ŋapep dom, sêkôm gêtŋ hoŋ bambaliŋ tôm si atac whiŋ, sêndic lau ti sêkôm ŋac ŋayom, ma sêtec mêtê ŋayham ti gêtŋ ŋayham hoŋ.

<sup>4</sup> Ŋac lau sêpêtŋ biakiŋ-ŋga, lau naŋ si lêtŋ saŋsalaŋ, ma lau sêtoc dau sa-ŋga. Ŋac atac whiŋ Anötô dom, tigeŋ ŋac atac whiŋ gêtŋ ŋayham-ŋayham nom-ŋga hôc gêlêc su.

<sup>5</sup> Ŋac sêsa si lêtŋ gitôm sem akiŋ Anötô, tigeŋ sêsêc iŋ ndê ŋaclai ahuc. Am mbo ahê lau kaiŋ dinaŋ hoŋ.

<sup>6</sup> Bu ŋac si lau ŋatô sêmbac yom lau e lau dau sêkôc ŋac sa. Ma sêndôhônŋ ŋac si yom tasaŋ têtŋ lauwhê gauc babalê, e lauwhê dau sêsôc ŋac si yom ŋapu. Lauwhê kaiŋ dinaŋ mêtê sac ti mêtê ŋalôm ŋagalac-ŋga gêm ŋac si ŋalôm ahuc.

<sup>7</sup> Ŋac atac whiŋ bu sêtŋgô yom daêsam, ma tac whiŋ bu lau sêndôhônŋ ŋac, magoc ŋac si gauc sa dom pi yom bocke iŋ yom ŋandô.

<sup>8</sup> Kêdôhônŋwaga tasaŋ dinaŋ sêkêtŋ kisa yom



ɲandô tòm Yanis lu Yambres sêkêɲ kisa Moses.\*  
 ɲac si gauc tisac su, ma ɲac si sêkêɲ whiɲ Anötö  
 mbasi sambuc.

<sup>9</sup> Magoc ɲac si gwelen oc nem ɲandô dom,  
 ɲahu bu lau tigauc hoɲ oc sêɲyalê bu ɲac si lêɲ  
 iɲ lêɲ gauc mbasi-ɲga, tòm Yanis lu Yambres si  
 lêɲ.

### *Pol gêm la Timoti*

<sup>10</sup> Am daôm kêyalê aö tidôn. Am kêyalê yom  
 hoɲ naɲ aö kadôhôn, ti aneɲ lêɲ gambo-ɲga, ma  
 ɲahu bocke dec gakôm gwelen, aneɲ lêɲ gakêɲ  
 whiɲ-ɲga ti atac whiɲ lau-ɲga, ma lêɲ galhac  
 ɲaɲga ma gahôc ɲawapac ti atac malô-ɲga.

<sup>11</sup> Am kêyalê gêɲ hoɲ naɲ hóc asê aö yêc malac  
 Antiok, malac Aikoniam ma malac Listra, ma  
 ɲawapac ti ɲandê hoɲ naɲ aö gahôc. Magoc  
 Pômdau kêgaho aö su yêc gêɲ hoɲ dinaɲ.

<sup>12</sup> Yomandô wasôm têɲ am. Lau hoɲ naɲ sêkêɲ  
 whiɲ Yisu Kilisi, ma atac whiɲ bu sêsa lêɲ gitêɲ,  
 naɲ lau oc sêkêɲ kisa ɲac bocdinaɲ.

<sup>13</sup> Ma lau sac ti lau tasan si lêɲ sac oc tisac  
 sambuc. ɲac oc sêɲsau lau ma lau oc sêɲsau  
 ɲac.

<sup>14</sup> Ma am daôm, yom naɲ am kêdôhôn ma  
 kêɲ whiɲ su, naɲ sap dôn. ɲahu bu lau naɲ  
 sêndôhôn am, naɲ am kêyalê ɲac ti ɲac si lêɲ  
 gitêɲ su.

---

\* **3:8** Yanis lu Yambres - ɲgac lu dinaɲ si ɲaê yac oc datap sa  
 yêc Yom Lêɲsêm Akwa dom. Magoc lau ɲatô gauc gêm bu iɲlu  
 ɲgac mbectoma lu naɲ sêkôm gêɲ dalô bu sêhóc gêlêc gêɲ dalô  
 naɲ Moses kôm. Alic Eks 7:11, 22; ma 9:11.

<sup>15</sup> Têñ ndoc am mbo balê, nañ am kêyalê Anötö ndê yom dabuñ nañ sêto yêc nañ. Yom dau gitôm bu kêñ gauc têñ yac e dakêñ whiñ Yisu Kilisi ma datap Anötö ndê mwasiñ nem lau si-nga sa.

<sup>16</sup> Ma Anötö ndê yom hoñ nañ sêto yêc nañ, iñ ndê Nalau gêm gôliñ lau dec sêto. Bocdinañ yom dau iñ ñayham bu tandôhôn têñ lau, tu datôc lau si giso asê ma tamatôc ñac-nga, ma tu dawhê Anötö ndê lêñ gitêñ sa-nga.

<sup>17</sup> Yac dakôm bocdinañ tu bu Anötö ndê lau sêñyalê iñ ndê yom hoñ tidôn, ma yom dau nem ñac sa e sêkôm si gêñ sambob ñapep eñ.

## 4

<sup>1</sup> Am kêyalê bu Yisu Kilisi oc mbu meñ ti ñaclai atu bu nem gôliñ gêñ hoñ, ma iñ oc êñsahê lau tali ma lau batê pi ñac si mêtê. Yêc iñ anğô-nga, ma yêc Anötö anğô-nga, aô bu wandic yomsu am bocdec bu.

<sup>2</sup> Nem mêtê lau, ma whê Anötö ndê yom sa têñ ñac tôm têm hoñ. Kêñ puc lau bu sêkôm sac dom, ma ñac nañ sêkôm giso, nañ tôc ñac si giso asê e sêkac si ñalôm kwi. Êmgilí lau hoñ bu sêlhac ñaŋga. Puc daôm dôñ ma lhac ñaŋga ti atac pa su. Ma whê gêñ hoñ sa yêc awê têñ lau.

<sup>3</sup> Bu têm oc meñ sa, nañ lau oc sêtec bu sêñgô yom ñandô pi Anötö ndê lêñ. Magoc ñac oc atac whiñ bu sêñgô yom nañ puc ñac dôñ bu sêkôm mêtê sac-sac tôm ñac dau si atac whiñ. Tu dinañ-nga dec ñac oc sêsap kêdôhônwaga tasan dôñ, ma sêhê danğa ñac si yom ñapep eñ.

<sup>4</sup> Nac oc sêpôc dangasuj ahuc têtj yom nandô, ma tac whinj bu sêngô lau andô si minj nambwa-nambwa.

<sup>5</sup> Magoc am ngac daôm ngô. Yob daôm bu kôm gêtj honj ti gauc eñ. Hôc nâwapac ti atac pa su, hoc nâwaê nâyham asê têtj lau, ma kôm am nem gwelêj nem akiñ Anötö-nga honj nâpêp ma ti atac whinj.

<sup>6</sup> Ma aö daun dec, kasahê bu têtj menj kêpiñ bu wahu nom dindêc siñ. Anêj têtj wambo nom-nga gitôm laclhu wain-nga nanj sêkêc pi alta ti da têtj Anötö, ma kêpiñ bu pacndê.

<sup>7</sup> Aö galhac nanja ma gac siñ tu Anötö ndê yom nâyham-nga, aö kati e gahôc asê nâbatinj su, ma gakôc anêj gakêj whinj dôj.

<sup>8</sup> Pômdau, yac neñ ngac gitêj êmatôc yac-nga kêmasanj nâôli nâyham bu kêj têtj lau gitêj têtj bêc nambu-nga. Ma malô aö watap nâôli nâyham dau sa. Magoc aö tanwasêj dom. Lau honj nanj sêkêj bata Yisu bu mbu menj, nanj oc sêtap si nâôli nâyham sa bocdinañ.

*Pol tac whinj bu Timoti têtj inj ndi*

<sup>9</sup> Aö tac whinj bu am êmasanj daôm nâgahô ma têtj aö mweñ.

<sup>10</sup> Bu aö kakiñ Kresens têtj gamenj Galesia-nga gi, ma Taitus têtj gamenj Dalmesia-nga gi. Ma Demas hu aö siñ ma kölhö têtj malac Tesalonika gi, nâhu bu inj tac whinj gêtj nom-nga hôc gêlêc su.

<sup>11-12</sup> Aö kakiñ Tikikus têtj malac Epesas gi su, ma Luk tawasê dec mbo whinj aö. Têtj ndoc

am mwenj, goc kôc Mak whinj am, bu inj ngac ngayham bu nem aö sa tu anenj gwelenj-nga.

<sup>13</sup> Ma kôc anenj ñakwê baliñ nanj gahu siñ whinj Kapus yêc malac Troas, ma kôc anenj bapia tilhuñ. Ma aö tac whinj ñandô bu am kôc anenj bôc ñamlic ñatô, nanj sêto Anötö ndê yom pi, nanj whinj.

<sup>14</sup> Aleksanda, ngac pec ain-nga dinanj, inj kêñ kisa aö ma kôm mêtê sac daêsam têtj aö. Pômdau oc kêñ ñagêyô têtj inj, êñkuc inj ndê mêtê sac.

<sup>15</sup> Yob daôm tu inj-nga, bu inj kêñ kisa yac tu gwelenj ñawaê ngayham-nga, ma kalhac lau ahuc bu sêñgô dom.

<sup>16</sup> Têtj ndoc ñamata-nga nanj lau Rom-nga sêmatôc anenj yom, nanj lau danj sêpuc aö dôñ dom, hoñ sêhu aö siñ. Magoc aö watenj Anötö bu suc ñac si giso kwi.

<sup>17</sup> Têtj ndoc dinanj Pômdau dau kalhac whinj aö ma puc aö dôñ, dec gam mêtê hoñ timala ma ñlau gamenj apa-nga hoñ nanj sêmbô andu sêmatôc yom-nga, nanj sêñgô. Ma inj kêgaho aö su yêc layon whasun.\*

<sup>18</sup> Ma aö gakêñ whinj bu inj oc nem aö si yêc gêtj hoñ nanj lau sac bu sêkôm têtj aö, ma kêñ

---

\* **4:17** Pol sôm bu Pômdau gêm inj sa bu layon senj inj dom. Têtj têtj dinanj lau nanj sêkêñ kisa lau sêkêñ whinj-nga nanj sêkêñ daêsam têtj layon senj ñac. Tigenj ñac sic yao bu sêkêñ lau Rom-nga têtj layon dom. Pol inj ngac Rom-nga (Apo 16:37) ma tu dinanj-nga lau atu-tu gauc gêm bu Pol ndê yom dinanj inj gitôm yom gôlinj, ma lau sac nanj sêkêñ kisa inj, nanj inj gêm dôhôn ñac pi layon.

aö wandöc ñayham yêc in ndê gameñ undambê-  
nga. Dahoc in ndê waê asê kwahic dec ma tòm  
bêc hoñ ndi. Yomandô!

*Yom ñambu-nga*

<sup>19</sup> Kôm aneñ acsalô ñayham têtñ Prisila lu  
in nakweñ Akwila ma têtñ lau hoñ nañ sêmbo  
Onesiporas ndê andu.

<sup>20</sup> Erastas gacgeñ mbo malac Korin, ma gahu  
Tropimus siñ mbo malac Miletus, bu in gêmbac.

<sup>21</sup> Aö tac whiñ bu am mweñ ñagahô, ma  
hêc asê dindêc muñ su, nañ goc ndoc uhô-nga.  
Yubelas lu Pudens, ma Lainas lu Klaudia ma  
asidôwai gameñ dindêc-nga hoñ sêkêtñ si acsalô  
têtñ am.

<sup>22</sup> Pômdau whiñ am ma in ndê mwasiñ puc  
mac hoñ dôñ.

**Anötö ndê Yom Lêñsêm Wakuc**  
**Bugawac: Anötö ndê Yom Lêñsêm Wakuc New**  
**Testament**

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 28 Dec 2024 from source  
files dated 29 Jan 2022

1dcc5a6c-3c1e-54e8-aa77-af18a3782048